



ANG

Bayan

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLII Blg. 1  
Enero 7, 2011  
www.philippinerevolution.net

Editorial

## Itigil ang mapaminsalang malakihang pagmimina

Ipinagbabawal ng demokratikong gubyernong bayan ang operasyon ng lahat ng mga empresang mapandambong, mapaminsala sa kalikasan at kontra sa interes ng mamamayan at ng kanilang rebolusyonaryong kilusan. Tampok sa mga ito ang malalaking kumpanya sa pagmimina. Halos lahat ng mga ito ay 100% pag-aari ng mga dayuhang imperyalistang kumpanya.

Halos lahat din ng mga empresang ito ay may operasyon sa mga lugar na saklaw ng mga base ng armadong rebolusyonaryong kilusan. Malinaw ang patakaran ng rebolusyonaryong kilusan hinggil sa mga salot na empresang ito. Dapat patigilin at panagutin sila dahil sa idinudulot nilang kapinsalaan at patalsikin sila sa mga larangan, sona at baseng gerilya at sa kabuuan ng bansa.

Muling inililina ang naturang patakaran sa harap na pagbabanta kamakailan ng malalaking dayuhang kumpanya sa pagmimina na aalis na raw sila dahil sa bumibigat na pagbubuwis sa kanila ng rebolusyonaryong kilusan. Umasta pa ang mga ito kasabay ng mga kasabwat nilang matataas na upisyal ng papet na reaksyunaryong gubyerno at hukbo na dapat itong pag-usapan sa nalalapit na muling pagbubukas ng usapang pangkapayapaan sa pagitan ng National Democratic Front of the Philippines (NDFP) at Government of the Republic of


the Philippines (GRP).

Huwad ang pinalalabas nilang mga benepisyong hatid sa ekonomya ng bansa at sa kabuayan ng mga komunidad sa lugar ng kanilang mga operasyon. Katunayan, dalawa sa pinakamahihi-rap na prubinsya sa buong bansa ay nasa rehiyon ng Caraga na siyang itinuturing ngayong "mining capital of the Philippines and Asia."

Napakalaking pinsala ang idinudulot ng mga operasyon sa pagmimina: Nilalapastangan nila ang pambansang patrimonya. Malawakan ang pangangamkam ng lupa. Dinadambong nila ang likas na yaman ng bansa at winawasak ang kapaligiran. Nilalason nila ang tubig, mga pananim, pangisdaan, pastuhan at iba pang natural na pinagkakabuhayan. Isinasapanganib nila ang buhay ng tao. Labis ang pagsasa-

mantala nila sa mga manggagawa. Niyuyurakan nila ang kabuuang interes at kagalingan ng mamamayan.

Sa kalakhan ay mga pambansang minorya ang tinatamaan ng pinsalang ito dahil sila ang karaniwang nakatira at kadalasang nakarami sa mga lugar ng operasyon ng malalaking minahan. Walang pahintulot ng mamamayan at rebolusyonaryong kilusan ang pagpasok at operasyon ng malalaking minahan, at lumala-



**Mga tampok sa isyung ito...**

Dayuhang pagmimina, salot sa bayan PAHINA 3

"Pista" sa bayan ng San Agustin PAHINA 5

Lupa, hindi militarisasyon PAHINA 11

bag ang mga ito sa mga patakan, batas at regulasyon ng mga demokratikong pamahalaang bayan.

Malakas ang pagtutol ng mamamayan sa malawakang dayuhang pagmimina. Mahigpit ang paglaban ng mga manggagawa, mga minoryang mamamayan maging ang mga taong-simbahan, mga lokal na guberno, tagapagtaguyod ng kalikasan at karapatang-tao at iba pang mga sektor. Matinding panunupil ang tugon sa gayong mga paglaban. Ang malalaking kumpanya sa pagmimina ay nagtatayo ng sariling armadong hukbong panseguridad para supilin ang mamamayan. Aktibong nakikipagkutsaba rin ang mga ito sa mga pasistang pwersang militar, paramilitar at panseguridad ng reaksyunaryong estado.

Hindi pinahihintulutan ng rebolusyonaryong kilusan ang kanilang presensya. Labas sila sa saklaw ng rebolusyonaryong pagbubuwis na ipinatutupad ng mga demokratikong organo ng gubernong bayan para sa kagalingan at pagpapaunlad ng kabuhayan ng mamamayan at mga programang sosyo-ekonomiko sa mga rebolusyonaryong erya. Para sa Partido at buong rebolusyonaryong kilusan, pinakamainam na tuluyan nang mapalayas ang walang pa-


kinabang na malalaking dayuhang kumpanyang nagmimina di lamang sa malaking bahagi ng saklaw ng mga rebolusyonaryong base kundi sa buong bansa.

Mainam ngang maisalang sa usapang pangkapayaan ang usapin ng malaking dayuhang pagmimina alinsunod sa kasunod na paksa ng mga repormang sosyo-ekonomiko. Bahagi nito ang paggigiit ng pambansang soberanya at kapangyarihang bayan. Kinikilala ng rebolusyonaryong kilusan ang pakinabang sa mamamayan ng responsableng pagmimina at iba pang paggamit ng mga natural na rekurso. Subalit kailangang magkaroon ng mahigpit na superbisyon at regularisasyon ng mga ito.

Inihahapag ng NDFP ang sumusunod na panukala:

*“Ang lahat ng rekursong publiko, kabilang ang lupa, tubig, mga mineral, karbon (coal), petrolyo at iba pang mineral na langis, lahat ng pwersa ng potensyal na enerhiya, pangisdaan, kagubatan, mga hayop at halaman at iba pang likas na yaman ay hindi ililipat sa pag-aari ng mga dayuhan.*

*Ang lahat ng operasyon sa pagmimina ay istriktong isasailalim sa mga regulasyon upang tiyakin ang lokal na pagpoproseso*




ng mga hilaw na mineral hanggang sa ikalawa at ikatlong antas ng produksyong industriyal habang ginagarantiyahan ang pangangalaga sa kapaligiran, kumpensasyon para sa abala at pinsala sa mamamayan, gayundin ang demokratikong konsultasyon at pahintulot ng mamamayan sa mga komunidad na kagyat at direktang naapektuhan ng gayong mga operasyon.”

Kaugnay nito, dapat magkaroon ng masusing pagtutuos sa malawakang pinsalang idinulot sa mamamayan at bansa ng pagtotroso, pagmimina at mga plantasyon ng mga dayuhang malalaking kumpanya.

Batid ng malalaking dayuhang kumpanya sa pagmimina at mga kakutsaba nilang mataas na upisyal ng estado na ipinatutupad at igigiit ng rebolusyonaryong kilusan ang mga panukalang ito upang wakasan ang dayuhang pagmimina, ang irresponsableng panghuhuthot sa kayamanan ng bansa, ang pagyurak sa interes at kapakanan ng mamamayan at bansa at ang pangwawasak sa kapaligiran. Papalitan ito ng responsableng pagmimina para sa interes ng mamamayan sa ilalim ng pangangasiwa ng demokratikong pamahalaang bayan.

Ikinababahala ito ng malalaking dayuhan at papet na reaksyunaryo kaya nagkukumahog silang pigilan ang pagbubuo ng kasunduan batay sa mga panukala ng rebolusyonaryong kilusan.

AB

<div> Taon XLII Blg. 1 Enero 7, 2010</div> <div>Ang <i>Ang Bayan</i> ay inilalabas sa wikang Pilipino, Bisaya, Iloko, Hiligaynon, Waray at Ingles.</div> <div>Maaari itong i-download mula sa Philippine Revolution Web Central na matatagpuan sa: <a href="http://www.philippinerevolution.net">www.philippinerevolution.net</a></div> <div>Tumatanggap ang <i>Ang Bayan</i> ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikauunlad ng ating pahayagan. Maaabot kami sa pamamagitan ng email sa: <a href="mailto:angbayan@yahoo.com">angbayan@yahoo.com</a></div>	
<b>Nilalaman</b>	
<b>Editorial:</b> Itigil ang mapaminsalang pagmimina	1
Dayuhang pagmimina, salot	3
Pagsulong ng PKP sa Mindanao	4
“Pista” sa San Agustin	5
Iba pang mga pagdiriwang	6
Paglawak ng BHB sa Negros	7
5 armas, nasamsam sa DOriental	7
Palayain si Ka Bart	7
Mga paglabag AFP sa tigil-putukan	8
Magsasaka at aktibista, pinaslang	9
3 detenido, pinalaya na	9
Pagkamatay ni L. Co	10
Lupa, hindi militarisasyon	11
<b>Balita</b>	12

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

# Dayuhang pagmimina, salot sa bayan

Mula nang sakupin ng US ang Pilipinas noong pagtatapos ng ika-19 na siglo, pinag-iinitan na ng mga imperyalista ang mga likas na yaman ng bansa. Tampok dito ang pagmimina ng mineral at iba pang kayamanan.

Bago pa man agawin ng US ang Pilipinas mula sa kolonyal na paghahari ng Spain, batid na at pinaglalawayan na nito ang pagiging masagana ng Pilipinas sa ginto at iba pang likas na kayamanan. Kaya nang unang sakupin ng US ang bansa, pangunahing tiniyak nito ang pagbubukas ng mga minahan ng ginto at iba pang mahahalagang metal. Sa buong paghahari nito, bilyun-bilyong dolyar na halaga na ng ginto, iba pang mahahalagang mineral at likas na yaman ng bansa ang hinuthot ng mga imperyalistang kumpanya, pangunahin na ng mga kumpanyang Amerikano.

Tukoy ng mga sakim na imperyalista na sa kabila ng napakarami nang nahuthot na yaman ng bansa, marami pang malilimas dito. Ang Pilipinas ay kabilang sa limang bansa sa daigdig na pinakamayaman sa tanso (*copper*), *nickel* at *iron ore*. Pinakamalaking halaga pa rin sa mga mineral na nabubungkal at nailuluwas sa bansa ang ginto.

Sa pinakahuling pananaliksik ng US State Department, may maaaring mabungkal pang mahigit pitong bilyong tonelada ng mga yamang mineral na nagkakahalaga ng \$840 bilyon. Kabilang dito ang mahigit 100,000 tonelada ng ginto at mga limang bilyong toneladang tanso. Bukod dito, may mabubungkal pang mahigit 50 bilyong tonelada ng mga di mineral na bato, tulad ng marmol, at may natukoy na ring malaking potensyal sa pagbubungkal ng mga deposito ng langis at natural na gas sa mga latian at kara-

gatan.

Batay sa kanilang tuluy-tuloy na pagsasarbey, may tinutukoy ang mga imperyalistang kumpanya sa pagmimina na mahigit sangkatlo ng kalupaan sa bansa na mayaman sa mga depositong mineral, pangunahin na sa ginto, tanso at *nickel*. Umaasa ang papet na rehimen na makapagpapapasok ng hanggang \$13 bilyong bagong pamumuhunan ang mga dayuhang kumpanya sa pagmimina. Pati na ang mga katubigan, kabilang na ang mga latian sa loob ng bansa (tulad ng Liguasan Marsh sa Mindanao) at karagatan sa paligid (tulad ng sa Palawan) ay pinag-iinteresang nang husto para sa pagmimina ng natural na gas at langis.

Todo-todo ang pangangayupapa at pagbibigay ng maraming kaluwagan ng iba't ibang papet na rehimen para akitin ang mga dayuhang kumpanya sa pagmimina. Kinatampukan ito ng paglalabas ng Philippine Mining Act of 1995, na nagbukas ng halos buong bansa sa pagmimina. Nagpapahintulot ito ng pagpasok ng mga kumpanya sa pagmimina na 100% pag-aari ng mga dayuhan, sa kabila ng isinasaad sa saligang batas ng mismong reaksyunaryong gubyerno na ang pagbubungkal ng mga yamang mineral


sa bansa ay nakareserba sa mga Pilipino o mga korporasyong di bababa sa 60% kontrolado ng mga Pilipino.

Nagbibigay ang batas na ito ng tatlong klaseng awtoridad sa pagmimina ng mga kumpanya. Isa na ang Financial and Technical Assistance Agreement (FTAA) na nagbibigay ng awtoridad sa isang kumpanya para sa eksplorasyon ng hanggang 81,000 ektarya sa loob ng 25 taon sa bawat kontrata. Kailangan dito ng minimum na \$50 milyong puhunan, kaya mga dayuhang kumpanya ang nakakopo sa halos lahat ng mga FTAA. Nagagawa pa nilang masaklaw ang daan-daang libong ektarya sa pamamagitan ng maraming FTAA.

Ang iba pang awtoridad na ibinibigay ng Mining Act ay ang Mineral Production Sharing Agreement (MPSA), kung saan may pagtutulungan ang kumpanya at ang gubyerno. Mayroon ding Exploration Permit na nagbibigay sa kumpanya ng awtoridad na maghanap ng mga mineral sa iba't ibang saklaw sa loob ng dalawang taon.

Nasasakop na ng mahigit 100 FTAA ang umaabot sa siyam na milyong ektarya o halos sangkatlo ng 30 milyong ektaryang kabuuang kalupaan ng bansa. Halos lahat (99) ng mga ito ay direktang hawak ng mga dayuhang kumpanya sa pagmimina. Dagdag pa rito ang malawak na nasasakop din ng mga MPSA at EP.

Mayorya  
n g





mga ito ay nasa lupang ninuno ng mga pambansang minorya, kaya sila ang pangunahing nabibiktima ng pangangamkam at pagpapalayas. Nasisira rin ang kanilang mga kagubatan at iba pang likas na kayamanan at nawawasak ang kanilang kabuhayan na nagdudulot ng kagutuman. Nilalapastangan ang kanilang katutubong kaugalian at kultura, at dumaranas sila ng iba't iba pang anyo ng pang-aabuso at pang-aapi.

Sa Cordillera, na isa sa mga rehiyong may pinakamalaking konsentrasyon ng mga pambansang minorya, umaabot sa 70% ng mga lupain ang saklaw na ng mga FTAA. Ang lahat ng ito ay mga lupang ninuno ng iba't ibang tribo sa rehiyon. Galing sa mga minahan dito ang 25% ng ginto at 40% ng tanso na namimina at nailuluwas sa bansa.

Pinakamalawak ang nasa-saklaw ng malakihang dayuhang pagmimina sa lupang ninuno ng mga Lumad at Moro sa Mindanao. Kung pagsasamahin ang Caraga Region at Zamboanga Peninsula, na kabilang din sa pinakamasasaklaw na pinagmiminahan sa bansa, mahigit 2.3 milyong pambansang minorya ang malubhang apektado ng pang-aapi ng malakihang dayuhang pagmimina. **AB**

## 42 taon ng pagsulong ng digmang bayan sa Mindanao

*Mga sipi mula sa mensahe ni Jorge "Ka Oris" Madlos, Tagapagsalita ng National Democratic Front-Mindanao, noong Disyembre 26, 2010 sa mga kasapi ng Partido, Pulang mandirigma, mamamayan, kaibigan at iba pang bisita sa San Agustin, Surigao del Sur bilang paggunita sa ika-42 anibersaryo ng Partido Komunista ng Pilipinas*

**H**indi matatamo ang mga rebolusyonaryong tagumpay nitong nagdaang 42 taon kung wala ang pagpupunyagi at determinasyon ng mamamayang Pilipino na isulong ang puspusang pakikibaka. Hindi rin ito makakamtan kung wala ang wastong pamumuno ng PKP na nagsisilbing liwanag ng mamamayan sa kanilang armadong rebolusyon at mga pakikibakang masa.

Mula sa isang grupo ng Partido nang unang umugat ang PKP sa Mindanao noong 1971, mayroon nang limang Panrehiyong Komite na sumasaklaw sa buong isla. Ang ilang libong kasapi ng Partido sa Mindanao ang namumuno sa ilang daang libong organisadong masa. Pinamumunuan ng Partido ang ilampung platon at kumpanya ng Bagong Hukbong Bayan (BHB). Mayroon na itong 42 larangang gerilya mula 39 noong nagdaang taon. Nakapaglunsad ngayong taon ang BHB sa Mindanao ng 250 taktikal na opensiba laban sa mga pwersang militar, paramilitar at pulisya at nakasamam ng 200 malalakas na sandata. Katumbas ng isang batalyong tauhan ang nalagas sa kaway.

Pinamumunuan ng Partido ang mga pakikibakang bayan sa Mindanao para sa reporma sa lupa at iba pang mga isyung pang-ekonomya, karapatang-tao at iba pang karapatang pampulitika, karapatan para sa pagpapasya-sa-sarili ng mga Lumad kabilang ang mga kapatid nating Moro, ang pakikibaka laban

sa pampulitika at pangmilitar na panghihimasok ng US, pati na para sa pangangalaga at muling pagbuhay sa ating kalikasan.

Pinalakas at pinalawak ng Partido ang nagkakaisang prente sa buong isla. Nakapanaig ang mga rebolusyonaryong pwersa sa harap ng mararahas na sustenidong atake ng magkakasunod na reaksyunaryong rehimen mula nang ipataw ang batas militar noong 1972. Mula noong unang bahagi ng yugto ng estratehikong depensiba, sumulong ang matagalang digmang bayan tungo sa panggitnang bahagi at ngayo'y nakatanaw ito sa pagtupad ng mga rekisito para lubusin ang huling bahagi sa susunod na limang taon at pumasok sa yugto ng estratehikong pagkapatas.

Bigung-bigo ang mga brutal na kampanyang militar ng AFP sa ilalim ng Oplan Bantay Laya



sa mga layunin nito. Sa halip na madurog ng Oplan Bantay Laya (2001-2005), lumawak at lumakas ang buong rebolusyonaryong kilusan. Bigo ang Oplan Bantay Laya 2 (2006-2010) hindi lamang sa pagdurog sa mga rebolusyonaryong pwersa, kundi sa pagpigil sa tuluy-tuloy na pagsulong ng digmang bayan. Nakamit ng kasalukuyang bagong demokratikong rebolusyon ang higit na mas malalaking tagumpay kumpara sa mga nagdaang rebolusyonaryong kilusan ng mamamayang Pilipino.

Malinaw nitong ipinakikita ang pagkakapanday at kakayahang ng PKP na pamunuan at isulong ang rebolusyong bayan. Sa kabilang panig, lugmok ang naghaharing sistemang panlipunan sa lumalalang krisis sa ekonomya at pulitika. Nagtatagal ang pagkalugmok ng pandaigdigang sistemang kapitalista. Pinagdurusahan ng mamamayang Pilipino ang lumalalang kundisyong bunsod ng mga patakaran ng liberalisyon, pribatisasyon, deregulasyon at denasyunalisasyon na ipinataw ng US at IMF. Matagal nang nawalan ng pagasa ang mamamayan na makakamit ang kanilang pambansa at demokratikong adhikain sa ilalim ng kasalukuyang naghaharing sistema.

Ang bagong inilabas na Oplan Bayanihan ng rehimeng US-Aquino ay pag-uulit lamang sa Oplan Bantay Laya sa pagsalalay nito sa brutal na kampanyang militar ng panunupil. Tulad ng nagdaang mga kampanya ng AFP, magiging kontra-produktibo ang Oplan Bayanihan kapwa sa ekonomya at pulitika. Sasairin lamang nito ang rekursong guberno at lalong gagalitin ang mamamayang Pilipino. Sa Mindanao, lalo lamang nitong pag-aalabin ang galit ng mga Lumad, mamamayang Moro at di Moro at itutulak silang magkaisa sa ilalim ng bandera ng NDF at pamumuno ng PKP.

## "Pista" sa bayan ng San Agustin

Sakay ng mga *multicab*, dyip, trak at bus, libu-libong mamamayan ang dumagsa sa isang baryo sa San Agustin, Surigao del Sur para dumalo at makisaya sa ika-42 anibersaryo ng Partido Komunista ng Pilipinas noong Disyembre 26. Nagmula sila sa iba't ibang dako ng Mindanao. Ilan sa kanila ay nagsimulang bumyahe mula pa hatinggabi para lamang makarating sa lugar.

Isang oras mula sa lugar na pagdarausan ng selebrasyon, tinangka silang pigilan ng mga elemento ng 4th ID. Nagtayo ng mga tsekpoynt ang mga sundalo sa kahabaan ng highway patungo sa San Agustin. Hinarang nila ang komboy na kinabibilangan ng umaabot sa 140 sasakyan at di mabilang na mga motorsiklo. Nilitratuhan at inilista ang mga pangalan ng mga dadalo, binusisi ang mga lisensya ng mga drayber at sinabihang bumalik na lamang sa kanilang mga pinanggalingan.

Pero nanindigan ang mga magsisidalo. Para labanan ang nakaambang banta ng militar, nagpasya silang mag-ipunipon muna sa Lianga at magkasabay na bagtasin ang nalalabing daan. Hindi sila natakot at hinarap nila ang mga sundalong nakamahabang armas. Dahilan nila, dapat galangin ng militar ang kanilang karapatang tumungo kung saan man nila naisin sa araw na iyon, alinsunod sa magkatugong tigil-putukan na naggagarantiya ng kanilang kaligtasan sa pagdalo sa anibersaryo ng PKP. Laluna't kasama nila ang mga kagawad ng midya, naiigiit nila ang kanilang kara-

patang tumuloy sa pagdiriwang kung saan sila ay imbitado. Napilitan ang militar na patuluyin sila pero ilang oras ding naantala ang kanilang paglalakbay.

Pagdating nila sa lugar, sinalubong sila ng mga katulad nilang mga karaniwang magsasaka, kababaihan at kabataan—mga myembro ng mga rebolusyonaryong organisasyong masa na nakapailalim sa demokratikong gubyrnong bayan. Masaya silang binati ng mga kaibigan, kakilala at kamaag-anak na Pulang mandirigma. Sinabitan sila ng mga ID, kinabitan ng *pin* na may *logo* ng Partido Komunista at inabutan ng kalendaryong naglalarawan ng pambansa-demokratikong rebolusyon.

Bago pa man ito, abala na ang bayan ng San Agustin para sa kanilang pagdating. Gabi pa lamang, nilinisan at ihinanda ng mga residente ang isang patag na bahagi sa gitna ng tubigan para dito idaos ang selebrasyon. Katulong ang mga mandirig-



ma mula sa Pulang Diwata Command, itinayo ng mga residente ang malapad na entablado at ilang mga kubo sa paligid nito para gawing pahingahan ng mga tao at lagakan ng pagkain. Ipinwesto nila ang malapad na telang pula sa isang pader at pininturahan ng dambuhalang maso't karet. Buong magdamag na abala ang mga residente at Pulang mandirigma sa paghahanda ng pagkain, pag-aayos ng mga bandila at iba pang kagamitan, pagpwesto ng *sound system*, pagsasanay sa kanilang mga presentasyon at iba pa.

Bandang alas-10 ng umaga, sinimulan ang programa sa pamamagitan ng parada ng mga bandila at martsa ng umabot sa 100 Pulang mandirigma. Nakasuot ng berdeng kamisa-de-tsinong na may pulang *badge* ng BHB sa kaliwang balikat, itinaas nila ang kanilang mga armas bilang pagtatanghal sa bandila ng PKP habang kinakanta ang Internasyunal.

Matapos ito, mainit na binati ni Ka Bill, upisyal ng PKP sa rehiyon, ang maayos na pagdating ng mga bisita sa kabila ng panggigipit ng militar. Sumunod ang talumpati ni Jorge "Ka Oris" Madlos, tagapagsalita ng National Democratic Front-Mindanao.

Inilahad niya ang pagsulong at mga tagumpay ng Partido Komunista ng Pilipinas sa isla. (*Tingnan ang kaugnay na artikulo*.) Sa pagitan ng mga talumpati, nagtanghal ang isang grupo ng Kabataang Makabayan. Nakabihis pula at may pintura ang mga mukha, isinadula nila ang kasaysayan ng Partido mula sa pagkakatatag nito hanggang sa kasalukuyang yugto ng paghahanda para sa estratehikong pagkapatas sa susunod na limang taon. Inilarawan nila sa kanilang mga galaw, sayaw at kanta ang mga dahilan kung bakit lumalakas ang armadong rebolusyon sa kanayunan at ang kawastuan nito.

Matapos ang maikling pangkalahatang programa, kinapanayam si Ka Oris ng mga kagawad ng midya na dumayo sa lugar. Itinanong ng mga tagamidya si Ka Oris kung ano ang mga maaaring asahan sa usapang pangkapayapaan, ang mga detalye ng pagsulong ng rebolusyon sa isla, ang patakaran ng PKP sa pagmimina, kalagayan ni Ka Roger at iba pa. Masusing pinakinggan ng lahat ang mga sagot ni Ka Oris. Lampas 40 kagawad ng lokal, pambansa at internasyunal na midya ang nagpaunlak sa imbitasyon ng rebo-

lusyonaryong kilusan at lumahok sa pagdiriwang.

Pagkatapos ng tanghalian, isa-isa ang nagtanghal ang mga bisita. Isang myembro ng organisasyon ng kababaihan ang kumanta tungkol sa pagtatayo ng tunay na kooperatiba at pagsulong ng rebolusyong agraryo. Isang pitong-taong gulang na bata, kasama ang kanyang mga magulang, ang umawit tungkol sa hinahangad niyang malaya at maunlad na kinabukasan. Sa bahaging ito, ang mga Pulang mandirigma naman ang nakinig sa ibaba ng entablado at pumalakpak sa kanila.

Umuwi ang mga dumalo sa selebrasyon na taglay ang mas mataas na mapanlabang diwa. Sabay-sabay silang lumikas sa lugar para iwasan ang panggigipit ng militar. Bitbit nila ang masasayang alaala ng sama-samang pagkilos at pananaig sa panggigipit ng reaksiyong hukbo; ng bihirang pagkakataong hayagang maisigaw ang kanilang mga pampulitikang paninindigan at makasalamuha ang kanilang hukbong bayan; ng simpleng pagsasalu-salo para ipagdiwang ang anibersaryo ng kanilang Partido; at ng sulyap sa pananagumpay ng rebolusyon. AB

## Ilan pang aktibidad, inilunsad sa ika-42 anibersaryo ng PKP

**N**aglunsad ng ilan pang aktibidad ang mga alyadong organisasyon ng National Democratic Front of the Philippines (NDFP) bilang pagdiriwang sa ika-42 anibersaryo ng Partido Komunista ng Pilipinas.

Nagsagawa ng Operation Pinta (OP) ang mga myembro ng Revolutionary Council of Trade Unions-Southern Tagalog (RCTU-ST) malapit sa mga pabrika sa Laguna at ilang bahagi ng Batangas noong Disyembre 12. Noong Disyembre 19, naglunsad naman ng raling iglap ang 40 myembro ng RCTU

sa plasa ng Biñan sa Laguna. Ayon kay Fortunato Magtanggol, tagapagsalita ng RCTU-ST, kailangang lumahok ang mga manggagawa sa digmang bayan sa pamamagitan ng pagsapi nila sa Bagong Hukbong Bayan. Nanawagan din ang RCTU-ST na tupdin ng uring manggagawa ang namumunong papel nito sa

rebolusyon.

Sa Rizal naman, naglunsad ng OP ang mga myembro ng Kabataang Makabayan (KM) sa ilang bayan at syudad ng lalawigan.

Sa Negros, nagsagawa ng isang *press conference* si Ka Marco, tagapagsalita ng PKP sa isla, kaugnay sa paglawak at paglakas ng armadong rebolusyon sa rehiyon. (*Tingnan ang kaugnay na artikulo*.)

Gayundin, sa iba't ibang bahagi ng bansa, naglunsad ng mga programa, pag-aaral at iba pang selebrasyon bilang paggunita sa anibersaryo. AB

# Tiyak ang paglawak ng BHB sa Negros

**T**iyak ang patuloy na paglawak ng Bagong Hukbong Bayan (BHB) sa Negros. Sa darating na mga taon, target nitong magkaroon ng lakas-kumpanyang larangang gerilya sa bawat distritong kongresyunal sa isla, alinsunod sa panawagan ng liderato ng Partido Komunista ng Pilipinas na umigpaw mula sa estratehikong dependensiba tungong estratehikong pagkapatas.

Inilahad ang planong ito sa idinaos na *press conference* noong huling linggo ng Disyembre sa kabundukan ng Negros kaugnay ng pagdiriwang ng ika-42 anibersaryo ng pagkakatatag ng PKP. Mariing sampal ang pahayag na ito sa paulit-ulit na propaganda ng mga tagapagsalita ng 3rd Infantry Division ng Philippine Army na nagsasabing mahina na ang pwersa ng rebolusyonaryong kilusan sa isla.

Ang gayong pagtaya, ayon

kay Ka Marco, tagapagsalita ng PKP sa Negros, ay posibleng makamit dahil sa pag-unlad ng kanilang baseng masa sa kabila ng ilang kahinaan at kakulangan. Hindi nakapigil ang pagtukoy ng AFP sa Negros bilang prayoridad na target ng kampanyang kontra-insurhensya sa buong Visayas dahil lumaki rito ang baseng masa nang 30-40%. Kaugnay din nito, iniatras ng liderato ng AFP ang kanilang dedlayn para durugin ang rebolusyonaryong

kilusan dito mula 2009 tungong 2010. Muli itong binago alinsunod sa bagong oplan ng AFP.

Ayon naman sa Negros Operational Command, may sapat na pwersa ang BHB sa isla para kamtin ang mga target na ito. Bahagi ng puhunan ng BHB ang matagumpay na paglulunsad ng BHB noong nakaraang taon ng mahigit 30 taktikal na opensiba at pagsamsam ng mahigit 20 malalakas na armas mula sa mga ito. Mahigit 20 tropa ng AFP ang napatay at 15 ang nasugatan.

Tinataya ng PKP sa Negros na makakamit ang humigit-kumulang pitong lakas-kumpanyang larangang gerilya sa Negros Occidental at tatlong lakas-kumpanyang larangang gerilya naman sa Negros Oriental sa susunod na limang taon bilang paghahanda sa pagpasok sa yugto ng estratehikong pagkapatas. AB

## 5 armas, nasamsam sa Davao Oriental

**L**imang armas ang nasamsam ng mga Pulang Lmandirigma sa ilalim ng Antonio Nerio Antao Command ng Bagong Hukbong Bayan (ANAC-BHB) nang disarmahan nila si Romeo Antuling, isang despotikong kapitan ng barangay sa Barangay Old Macopa, Manay, Davao Oriental noong Disyembre 15, bandang alas-12:10 ng tanghali.

Kabilang sa mga nasamsam ang dalawang ripleng M16, dalawang awtomatikong *shotgun* at isang kalibreng .45 pistola.

Ayon kay Dyomabuk Kadyawan, tagapagsalita ng ANAC, si Antuling ay despotikong upisyal ng barangay. Kinakasangkapan niya ang kanyang impluwensya para mag-ipon ng malalakas na armas at magbuo ng pribadong hukbo. Marami rin siyang kaso ng paglabag sa karapatang-tao sa bayan ng Manay. Ginagamit niya ang kanyang armadong grupo para takutin ang mga sibilyan sa lugar, dagdag ni Kadyawan.

Samantala, ayon sa pinakahuling ulat ni Ka Amado Pesante, tagapagsalita ng Rodante Urtal Command ng BHB sa Northern Samar, nakakumpiska ng 11 armas ang mga Pulang mandirigma sa matagumpay nilang ambus laban sa 12-kataong yunit ng Bravo Company ng 63rd IB sa Barangay Perez, Las Navas noong Disyembre 14. Kinabibilangan ito ng sampung M16 at isang K3 *light machine gun*, bukod pa sa mga bala at kagamitang militar. AB

## Kagyat na pagpapalaya kay Ka Bart, iginiit

**I**giniit ng Partido Komunista ng Pilipinas Inoong Enero 5 ang kagyat na pagpapalaya kay Tirso "Ka Bart" Alcantara bilang paggalang sa Joint Agreement on Safety and Immunity Guarantees (JASIG). Nahuli ng AFP si Ka Bart sa Ibabang Iyam, Lucena, Quezon noong Enero 4. Kasama niyang naaresto ang isang lalaking kinilalang si Apolonio Cuarto.

Matapos mahuli, kaagad siyang ipinasok sa Camp Nakar, hedkwarters ng Southern Luzon Command at mula roon ay inilipad patungong V. Luna Hospital sa Quezon City dahil sa kanyang natamong sugat.

Para mahawakan, kaagad din siyang sinampahan ng 23 kasong kriminal.

Si Ka Bart ay konsultant sa usapang pangkapayapaan. Sa gayon, sakop siya ng JASIG. Magiging mainam para sa darating na usapan kung kagyat siyang mapapalaya. Habang nasa kustodiya siya ng gubyerno ng Pilipinas, iginigiit ng PKP ang makataong pagtrato sa kanya at paggalang sa kanyang mga karapatan. Iginigiit din nito na pahintulutang makipagkita sa kanya ang kanyang mga abugado at doktor. AB

# Mga paglabag ng AFP sa tigil-putukan

**T**ahasang nilabag ng AFP at PNP ang kasunduan sa magkatugong tigil-putukan ng NDFP at GRP na nagsimula noong Disyembre 16 at nagtapos sa Enero 3. Ginamit ng AFP at PNP ang 19 na araw na tigil-putukan para ipusisyon ang kanilang mga tropa sa loob at paligid ng mga larangang gerilya. Tiniktikan nila at hinaras ang mga pinaghihinalaang aktibista at tagasuporta ng armadong kilusan at nang-aresto sila ng mga pwersa ng BHB. Isang sibilyan ang napatay sa pananalasa ng AFP. Sumusunod ang mga insidente na nakalap ng *Ang Bayan*:

**Davao City.** Enero 1, 2011, nireyd ng Special Action Force ng PNP ang bahay sa Toril District na tinutuluyan ni Ka Edwin Brigano, isang kadre ng BHB. Si Brigano ay nagpapagamot noong panahon ng tigil-putukan para sa kanyang malalang sakit sa baga at atay. Ikinulong siya at sinampahan ng PNP-SAF ng mga gawa-gawang kaso.

**Quezon.** Disyembre 28, 2010, idinetine ng mga sundalo ng 74th IB ang sampung estudyante ng Polytechnic University of the Philippines na nasa Barangay San Andres, San Narciso, Quezon. Pinagbintangan silang mga kasapi ng BHB pero pinakawalan din dahil wala namang katibayan ang militar. Mula sa simula ng tigil-putukan noong Disyembre 16 ay halos walang tigil hanggang bago mag-Pasko ang mga opensibong operasyong militar ng 85th at 74th sa mga barangay ng White Cliff, Busuk-Busukan, San Juan, Sinagtala, Binay, San Vicente at Vigo Central sa San Narciso. Hinaras at nilitratan ng mga tropa ang mga residente sa ilang lugar na inoperasyon. Sa Sityo Mageron, Barangay Nasalaan sa bayan ng San Francisco, inipon

ng 24-kataong platoon ng sundalo ang kalalakihan at pwersa hang pinaghubad.

**Surigao del Sur.** Ilang araw bago at hanggang Disyembre 26, naglatag ng mga tsekpoynt ang mga pwersa ng 4th ID sa ilang barangay sa Surigao del Sur, maging sa pangunahing mga lansangang pamprubinsya, upang alamin ang eksaktong lugar na pagdarausan ng pagdiriwang ng anibersaryo ng PKP. Nang malaman na ng publiko ang eksaktong lugar, naglatag na ng tsekpoynt ang mga pulis at militar sa paligid ng bayan ng San Agustin upang harangin, takutin at pigilan ang mga tao na dumalo sa kasiyahan. Nabigo ang militar na pigilin at mga dadalo at naging matagumpay ang pagdiriwang. (*Tingnan ang kaugnay na artikulo.*)

**Occidental Mindoro.** Disyembre 23, inistraping ng mga pwersa ng

80th IB sa pamumuno ni Lt. Col. Roger Percol ang bahay na binibisita ng isang tim ng BHB sa Sityo Upper Balading, Barangay Bayotbot, San Jose. Napilitang umatras ang yunit ng BHB nang hindi nagpapaputok upang iwasang makatama ng sibilyan. Napatay ng militar ang sibilyang si Stephen Lester Barrientos (*tingnan ang kaugnay na artikulo.*) Inaresto naman ng militar si Ka Christian Bascos, isang kasapi ng BHB na dumadalaw sa kanyang kasintahan sa panahon ng tigil-putukan. Dalawa pang gerilya ang inaresto ng militar.



**Capiz at Iloilo.** Sa loob ng ilang araw simula Disyembre 21 ay naglunsad ng operasyong pangkombat (*combat clearing operations*) ang mga tropa ng 61st IB sa di bababa sa anim na barangay sa Tapaz, Capiz at Calinog, Iloilo.

**Agusan del Sur.** Disyembre 17, inaresto ng mga operatiba ng pulisya si Ka Pedro Codaste, upisyal ng NDF-North Central Mindanao, at kanyang mga kasamahan sa isang tsekpoynt sa bayan ng Bayugan.

**Ifugao at Mountain Province.** Disyembre 16, pumasok ang isang yunit kumando ng 5th ID sa hangganan ng Aguinardo sa Ifugao at Natonin sa Mountain Province. Kinabukasan, pumasisyon ito sa Sityo Tappo, Barangay Banawel, Natonin kung saan nagaganap ang Civil-Military Operations bilang prente sa isinasagawang opensibong operasyong militar ng Re-engineered Special Operations Team. Naglunsad din ng

operasyong militar sa ibang barangay sa Natonin, kabilang ang Alunugan, Balangaw, Banawel, Botac, Maducayan, Saliyok at Tonglayan, gayundin sa Banao, Botigue at

iba pang barangay sa bayan ng Paracelis.





# Lider-magsasaka at aktibista, pinaslang

Isang lider-magsasaka mula sa Nueva Ecija at isang aktibista mula sa Mindoro ang pinaslang ng mga armadong galamay ng reaksyunaryong estado noong Disyembre at unang mga araw ng Enero.

**Enero 2.**Pinaslang ng mga armadong lalaki na nakasakay sa isang motorsiklo sa Santa Rosa, Nueva Ecija si Oyi Villarosa, upisyal ng Alyansa ng Magbubukid sa Gitnang Luzon (AMGL), panrehiyong sangay ng Kilusang Magbubukid ng Pilipinas (KMP). Pinagbabaril si Villarosa habang pauwi sa kanyang bahay mula sa maghaponing pagtatrabaho sa bukid.

Nagtamo si Villarosa ng apat na tama ng bala mula sa kalibre .45 pistola na naging sanhi ng kanyang pagkamatay. Siya ang pinakaunang biktima ng ekstrahudisyal na pamamaslang ngayong 2011.

**Disyembre 23.** Isang kabataang aktibista na kasapi ng

grupong pangkultura sa Southern Tagalog ang napatay nang salakayin ng mga tropa ng 80th IB ng Philippine Army ang isang bahay sa bayan ng San Jose, Occidental Mindoro kung saan nakahimpil ang isang yunit ng Bagong Hukbong Bayan (BHB). Para hindi mapinsalaan ang mga sibilyan ay umatras ang mga Pulang mandirigma, ayon kay Ka Higom Maragang, tagapagsalita ng Lucio de Guzman Command ng BHB sa Mindoro.

Gayunman, napatay sa patraydor na pagsalakay ng mga pasistang tropa si Stephen Lester Barrientos, 19 taong gulang na kasapi ng Southern Tagalog Cultural Network (STCN), pang-

kulturang grupo ng mga kabataan sa rehiyon. Ayon kay Neil John Macuha, *deputy secretary general* ng Anakbayan-Southern Tagalog, si Barrientos ay nagpunta sa lugar na iyon para bisitahin ang kanyang amang nakatira sa Upper Balading, Barangay Bayotbot, San Jose. Aktibong kasapi ng STCN si Barrientos at ang pinakahuling pagtatanghal niya ay sa Mendiola noong Disyembre 10 kaugnay ng selebrasyon ng Pandaigdigang Araw ng Karapatang-Tao.

Para makaatras sa kanilang pananagutan, sinabi ng militar na napatay daw si Barrientos bunsod ng “palitan ng putok” sa pagitan nila at ng BHB. Di pa nagkasya sa kasinungalingang ito, dagdag pang hinagpis ang idinulot ng militar nang hindi nila payagan ang pamilya Barrientos na tubusin ang bangkay ng kanilang kaanak. Nang makuha na ng pamilya ang bangkay, ilang beses pa silang hinaras ng militar. **AB**

## Tatlong detenidong pulitikal, pinalaya

Tatlong detenidong pulitikal ang pinalaya bago magtapos ang 2010. Kabilang dito ang dalawa sa “Morong 43” at isang detenido sa Tuguegarao City.

Dalawa sa “Morong 43” na hindi nasama sa unang grupong pinalaya noong Disyembre 17 ang nakalabas na sa Metro Manila District Jail (MMDJ) sa Camp Bagong Diwa, Taguig City noong Disyembre 28. Sina Aldrin Garcia at Antonio de Dios ay napatunayang kapangalan lamang ng ibang mga akusado. Si Garcia, na sinasabing lulong daw sa droga ay pinalaya matapos mapatunayan sa pagsusuri na hindi siya gumagamit ng ipinagbabawal na gamot. Si de Dios naman, na isang maralita at

walang anumang karanasan sa mga tseke, ay napatunayang hindi sangkot sa kasong pag-iisyu ng talbog na tseke.

Bago pa ito, nakalabas na sa bilangguan si Myrna Cruz-Abraham na nakadetina sa Bureau of Jail Management and Penology Center sa Tuguegarao City. Si Abraham, isang konsultant ng mga samahan ng magsasaka at kasapi ng partidong Anakpawis sa Cagayan ay lumaya noong Disyembre 23 ng umaga pagkaraan ng siyam na buwan sa detensyon. Inaresto siya noong

Marso dahil sa pagkakadawit niya umano sa isang krimeng nangyari raw noong 2009. Isang linggo siyang itinago't ininteroga bago ihinarap sa korte. Ibinasura ng korte ang kaso laban kay Abraham dahil sa kakulangan ng ebidensya.

Samantala, sinabi ni Atty. Edre Olalia, abugado ng “Morong 43,” na paglabag sa mga karapatang pulitikal ang patuloy na pagkakakulong kina Rogelio Villarisis, Edwin Dematera at Danny Pinero gayong wala namang mandamyento de arresto o “commitment order” laban sa kanila.

Bukod sa tatlo, may nakakulong pang limang aktibistang bahagi ng “Morong 43” sa Camp Capinpin, Tanay at pinipilit na tumestigo laban sa kanilang mga kasama. **AB**

# Hindi namatay sa *crossfire* sina Leonardo Co

**N**apabulaanan sa resulta ng *fact-finding mission* ng Agham-Advocates of Science and Technology for the People ang sinasabi ng militar na namatay sa palitan ng putok sa pagitan ng Bagong Hukbong Bayan (BHB) at mga elemento ng 19th IB ang tanyag na syentistang si Leonardo Co at dalawa niyang kasamahan.

Batay sa salaysay ng mga nakaligtas na biktima, iba pang mga personaheng sangkot sa pangyayari at inspeksyon ng aktwal na pinangyarihan ng pamamaril, nakumpirma ng 33-kataong *fact-finding team* na inorganisa ng Agham na iisang direksyon lamang ang pinanggalingan ng mga putok na umutas sa buhay nina Co at kasamahan niyang sina Sofronio Cortez at Julius Borromeo.

Ilang oras nang nasa kagubatan ng Barangay Lim-ao, Kanaanga, Southern Leyte sina Co noong umaga ng Nobyembre 15 para mangolekta ng mga binhi ng mga punong kahoy para sa proyektong reporestasyon ng EDC. Kasama rin nina Co sina Roniño Gibe, isang *forest guard* at Policarpio Balute, isang magsasaka. Bago sila lumakad, pormal na ipinagpaalam ng EDC sa militar bandang alas-8:30 ng umaga ang aktibidad nina Co.

Bandang alas-12 ng tanghali nang biglang pagbabarilin sina Co. Isa-isa silang nagsidapaan sa lupa at nagsisisigaw ng "Mawa kayo, hindi kami kalaban!" "Tama na po!" Ani Balute, nirapido sila at may malalakas pang pagsabog na nagpauga sa lupa. Tumagal ito nang 15-20 minuto.

Si Balute ay tyemping nasa likod ng malaking puno nang paputukan sila. Nagpasya siyang tumakbo para makahingi ng saklolo sa EDC. Si Gibe naman ay nakagapang tungo sa isang malaking puno at nakapagtago rito. Ang iba'y napuruhan ng mga

bala dahil lantad sila sa mga namamaril.

Pagsapit ng alas-12:17, nasalubong ni Balute ang isang sasakyan ng EDC at nagpahatid siya sa upisina nito para iulat ang pamamaril. Halos kasabay nito ay nakapag-text si Gibe sa EDC para humingi ng tulong. Batay dito, agad ding nag-text ang EDC kay Co para sabihan silang umalis na sa lugar dahil mayroon daw nagaganap na engkwentro. Hindi pa batid noon ng EDC na sina Co mismo ang pinapuputukan, na nakahandusay na noon sa lupa ang duguang mga bangkay nina Co at Cortez at agaw-buhay na si Borromeo.

Matapos ang pamumutok ay nilapitan ng mga sundalo ang mga biktima. Nang makita ng mga sundalo si Gibe, paulit-ulit siyang ininteroga kung nasaan ang kanilang mga baril, saan napunta ang mga nakatakas niyang kasama at sino ang kontak nila. Paulit-ulit din silang sinasagot ni Gibe na hindi sila armado, at mga empleyado sila ng EDC na inatasang tumulong sa pananaliksik ni Co. Ibinigay niya ang mga pangalan ng mga upisyal ng EDC na maaaring kon-

takin para beripikahin ang kanyang salaysay. Ipinakita rin niya ang kanyang ID at ang sako ng mga nakolekta nilang binhi.


Hindi nila pinaniwalaan si Gibe. Sa halip ay pinadapa siya nang halos dalawang oras. Halos dalawang oras ding pinabayaan ang agaw-buhay na si Borromeo.

Saka na lamang nilapatan ng mga sundalo ng paunang lunas si Borromeo nang makatanggap na ng utos ang militar mula sa kanilang mga upisyal bandang alas-2 ng hapon. Alas-3 na ng hapon nang dumating ang ambulansya para kay Borromeo. Pero namatay din siya bago pa makarating sa ospital.

Nang mabatid na ng mga sundalo ang malaki nilang pagkakamali, tinangka nilang sindakin at lituhin si Gibe para hindi siya maging kapani-paniwalang testigo. Para makapagtanim ng pagdududa sa kanyang isip, tinanong siya kung hindi ba nila alam na may operasyong militar sa erya, at sinabihang namatayan pa raw sila ng dalawang sundalo. Sagot ni Gibe, koordinado sa militar ang kanilang pagpunta sa gubat at walang gayong paabot sa kanila. Kinutya muli si Gibe at sinabihang, "Imposible naman na hindi niyo nakita yung tatlong tao na may mga armas? *Thirty minutes* na kaming nag-oobserba na palakad-lakad sila!"

Malinaw na ang minatyagan ng militar ay ang grupo nina Co, na basta na lamang nilang pinagbabaril nang hindi man lamang tinitiyak kung sino sila. Lumabas din sa mga pahayag ng militar na wala silang natamong anumang kaswalti, taliwas sa pinagsasabi ng mga sundalo kay Gibe.

Nagpasya ang Agham na magsagawa ng sariling pagsisiyasat, dahil hindi pa man natatapos ang upisyal na imbestigasyon ng PNP-Kanaanga ay kinakatigan na ng pulisya ang mga kasinungalingan ng 19th IB.



# Lupa, hindi militarisasyon

Ibayong sumigla ang pakikibakang agraryo sa Negros bunga ng matagumpay na kampanyang bungkalan (basahin ang artikulong “Ang kampanyang bungkalan sa Negros,” sa isyung *Disyembre 7, 2010 ng Ang Bayan*). Napukaw ang natutulog na makapangyarihang lakas ng uring magbubukid na ipinakita nila sa mga sama-sama, sustenido at organisadong pagkilos para sa lupa, pagkain, trabaho at katarungang panlipunan. Mula nang simulan nila ang kampanyang bungkalan noong huling kwarto ng 2008, lumaganap ito sa buong isla at nagbunsod ng iba’t ibang anyo ng anti-pyudal na pakikibaka.

Nangahas na kumilos ang mga maralitang magsasaka at mga manggagawang bukid sa panawagang bungkalan sa harap ng kabiguan ng gubyerno na ipatupad ang pangakong lupa at hustisyang panlipunan. Palagi itong bukambibig ng bawat pangulo ng bansa mula kay Quezon noong panahon ng Commonwealth hanggang sa kasalukuyang papet na rehimen.

May kagyat na kahalagahan ang pagsasakatuparan ng tunay na reporma sa lupa sa Negros. Tuwing pagdating ng “tiempos muertos” o “patay na panahon,” hindi umaandar ang 11 sentral sa buong isla. Tigil ang ekonomya ng isla kung saan 85% ng agrikultura ay nakatuon sa pagtatanim ng tubo para sa eksport. Kung walang tubo, wala ring trabaho. At kung walang trabaho ay wala ring makain ang mayorya ng mamamayan. Ito ay habang ang mga nakaririwasang pamilya ng panginoong maylupa ay nagliliwaliw sa mga syudad ng Europe o US.

Sa gayong kalagayan, makatarungan lamang na bungkalin ng mga magbubukid ang nakatiwangwang na lupa, pagyamanin ito para may makain ang nagugutom nilang mga pamilya. Mas produktibo ang gayong mga aksyon kaysa sa umasa na lamang sila sa awa’t limos.

**Paghulagpos sa pyudal na pagkaalipin at pagsasamantala.** Mahigpit na tinututulan ng mga panginoong maylupa sa isla ang kampanyang bungkalan.

Ito ay dahil tahasan nitong hinahamon ang pyudal na paghahari ng mga pamilya nina Eduardo “Danding” Cojuangco (na may 11 asyenda sa buong isla), Jose Miguel Arroyo (asawa ng dating Presidente Gloria Macapagal-Arroyo), Daniel “Bitay” Lacson (dating gobernador ng Negros Occidental at Presidential Adviser for the Visayas kapwa noong administrasyon ni Cory Aquino at ngayon ni Benigno Aquino III), Gov. Alfredo Marañon ng Negros Occidental, Mayor Magdaleno Peña ng Pulupandan, Negros Occidental at mga pamilyang Teves at Limkai-chong.

Kasabwat ang mga panginoong maylupa, pinakilos ng reaksyunaryong estado ang mga mapanupil nitong instrumento para

supilin ang mga magbubukid. Bukod sa mga hukuman, militar, pulisya at mga pwersang paramilitar, pinakilos din nito ang bayarang bandidong grupo ng Revolutionary Proletarian Army (RPA).

**Kriminalisasyon ng mga kasong agraryo.** Itinuturing ng lokal na gubyernong dominado ng mga panginoong maylupa na mga aktong kriminal ang mga pagkilos ng mga magbubukid para igiit ang karapatan sa lupa at trabaho at laban sa gutom at militarisasyon. Sa halip na harapin ang makatarungang hiling ng mga magsasaka, sinasampan sila ng mga panginoong maylupa o mga tauhan nito ng mga kasong kriminal.

Batay sa ulat noong Agosto, may kabuuan nang 402 kasong kriminal na isinampa laban sa mga magbubukid. Napilitang magtago at mawalay sa kanilang mga mahal sa buhay ang 152 kataong may mandamyento de aresto (80 rito ay sa Negros Occidental). Dalawampu’t anim (26) na lider at aktibistang magsasaka ang nakakulong sa Bago at Cadiz. Dalawang kabataang magsasaka ang dinukot ng mga bandidong RPA at hindi pa inililitaw hanggang ngayon. **AB**

## Aroganteng asal ng mga sundalong US, kinundena

MARIING kinundena ng mga mamamahayag ang aroganteng asal ng mga sundalong Amerikano na nagbabantay sa himpilan ng US Joint Special Operations Task Force (JSTOFP) sa Zamboanga City at ipinanawagan sa Visiting Forces Agreement (VFA) Commission na imbestigahan ang insidenteng ito.

Ayon sa pahayag ng National Union of Journalists of the Philippines (NUJP), iligal at mapangutya ang ginawang pagbabawal ng mga sundalong Amerikano sa mga kagawad ng lokal na masmidya na nagkokober noon sa pagdalaw ni (ret) Gen. Edilberto Adan, myembro ng VFA Commission, sa hedkwarters ng Western Mindanao Command (Wesmincom). Nang tanungin nila ang mga sundalong US kung ano ang dahilan, nagbanta pa ang mga ito na kanilang kukumpiskahin ang kagamitan ng TV *network* kung hindi ito titigil sa pagbibidyo.

Iginigiit ng NUJP sa VFA Commission na ang aroganteng asal ng mga dayuhang sundalo ay hindi dapat palampasin dahil nangangahulugan ito ng pagsuko sa soberanya ng bansa.

## Mga kahilingan ng mga PAL *flight attendant*, pinaburan ng DOLE

PINABURAN noong Disyembre 24 ng Department of Labor and Employment (DOLE) ang mga kahilingan ng mga kasapi ng Flight Attendants' and Stewards' Association of the Philippines (FASAP), kabilang ang pagtataas sa edad ng obligadong pagreretiro. Bundod ng desisyong ito, iaatras na ng Philippine Air Lines Employees Association (PALEA) ang nakakasa na nitong pagwewelga para tutulan ang malawakang pagsibak sa 2,600 empleyado ng PAL at iba pang mapanggipit na patakaran.

Ibinaba ang desisyong ito pabor sa mga empleyado ng PAL makaraang mahigit isang linggong mamagitan ang gubyernong Aquino sa suliranin ng PAL at ng unyon nang isailalim ito sa *assumption of jurisdiction order* (AJ) noong Disyembre 16. Ang AJ ay kapangyarihang iginagawad sa presidente ng bansa at sa kalihim ng DOLE para panghimasukan ang mga sigalot sa pagitan ng maneydsment at mga manggagawa at pigilin ang paghantong nito sa welga.

Ayon sa PALEA at ngayngay ng Anakpawis Party-list sa PAL, mariing tinututulan ng mga manggagawa ang pagpapatupad ng maneydsment ng PAL sa lumang *collective bargaining agreement* (CBA) nila dahil lubhang dehado sila rito.

Magbubunsod ito ng malawakang tanggalan sa trabaho, mapapalitan sila ng hindi unyonisado at kontraktwal lamang na mga manggagawa na walang mga benepisyo at seguridad sa trabaho, at sa kalaunan ay mabubuwig ang kanilang unyon.

Sinuportahan ng mayorya ng mga unyon at asosasyon ng mga manggagawa sa buong

bansa ang pakikibaka ng mga manggagawa sa PAL dahil may estratehikong epekto ito sa kalagayan ng kilusang manggagawa sa Pilipinas laban sa kontraktwalisasyon at iba pang mapaniil na mga patakaran ng imperyalistang globalisasyon.

Kabilang sa mga nakamit na tagumpay ng mga kasapi ng FASAP ang pagtataas sa edad ng obligadong pagreretiro tungong 60 anyos, babae man o lalaki. Sa lumang CBA, ang mga *flight attendant* na babae na pumasok sa kumpanya makaraan ang Nobyembre 2000 ay pwersadong pinagreretiro pagsapit ng kanilang ika-40 kaarawan. Marami pang napagtagumpayang kahilingan ang mga *flight attendant* laluna para sa interes ng mga babae. Naipagwagi rin

nila ang P200 milyong kabuuang halaga ng dagdag sa kanilang sweldo sa susunod na tatlong taon—P2,000 hanggang P2,500 kada buwan sa unang taon at P1,300 sa susunod na mga taon.

Binigyan din sila ng alawans na bigas na halagang P1,800 kada buwan bawat kasapi at iba pang mga benepisyo.



## Panibagong singil sa NLEX at SLEX, tinutulan

NAGLUNSAD ng rali-protesta ang mga kasapi ng Pinag-isang Samahan ng Tsuper at Operators Nationwide (PISTON) nitong Enero 3 sa Alabang *viaduct* sa Muntinlupa City matapos ang panibagong singil sa *toll fee* ng North Luzon Expressway (NLEX) at South Luzon Expressway (SLEX) simula nitong Enero 1.

Sa SLEX, 300% ang itinaas sa singil at sa NLEX, ang sasakyang Class 1 ay magbabayad ng P41 mula Balintawak tungong Bocaue Interchange mula sa dating P36.

Maliban sa *toll fee*, sumisingil din ngayon ng doble ang

Metro Rail Transit (MRT). Magbabayad ang mga pasahero ng dagdag na sampung piso para sa byahe mula North Avenue sa Quezon City tungong Taft Avenue sa Maynila.

Tumaas din mula P30 tungong P40 ang *flagdown rate* ng

mga taksi pagkaraang aprubahan ng Land Transportation and Franchising Regulatory Board ang petisyon nila noong nakaraang taon.

Dahil sa laganap na mga pagtutol, inihapag ni Benigno Aquino III ang anda-andana na lamang daw na pagtaas ng singil ng NLEX at SLEX, na sa katunaya'y walang malaking binawas sa sobra-sobrang monopolyong tubo ng malalaking kapitalista.



ANG

Bayan

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Taon XLII Blg. 1  
Enero 7, 2011  
www.philippinerevolution.net

Editorial

## Itigil ang mapaminsalang malakihang pagmimina

Ipinagbabawal ng demokratikong gubyernong bayan ang operasyon ng lahat ng mga empresang mapandambong, mapaminsala sa kalikasan at kontra sa interes ng mamamayan at ng kanilang rebolusyonaryong kilusan. Tampok sa mga ito ang malalaking kumpanya sa pagmimina. Halos lahat ng mga ito ay 100% pag-aari ng mga dayuhang imperyalistang kumpanya.

Halos lahat din ng mga empresang ito ay may operasyon sa mga lugar na saklaw ng mga base ng armadong rebolusyonaryong kilusan. Malinaw ang patakaran ng rebolusyonaryong kilusan hinggil sa mga salot na empresang ito. Dapat patigilin at panagutin sila dahil sa idinudulot nilang kapinsalaan at patalsikin sila sa mga larangan, sona at baseng gerilya at sa kabuuan ng bansa.

Muling inililina ang naturang patakaran sa harap na pagbabanta kamakailan ng malalaking dayuhang kumpanya sa pagmimina na aalis na raw sila dahil sa bumibigat na pagbubuwis sa kanila ng rebolusyonaryong kilusan. Umasta pa ang mga ito kasabay ng mga kasabwat nilang matataas na upisyal ng papet na reaksiyunaryong gubyerno at hukbo na dapat itong pag-usapan sa nalalapit na muling pagbubukas ng usapang pangkapayapaan sa pagitan ng National Democratic Front of the Philippines (NDFP) at Government of the Republic of


the Philippines (GRP).

Huwad ang pinalalabas nilang mga benepisyong hatid sa ekonomya ng bansa at sa kabuayan ng mga komunidad sa lugar ng kanilang mga operasyon. Katunayan, dalawa sa pinakamahihi-rap na prubinsya sa buong bansa ay nasa rehiyon ng Caraga na siyang itinuturing ngayong "mining capital of the Philippines and Asia."

Napakalaking pinsala ang idinudulot ng mga operasyon sa pagmimina: Nilalapastangan nila ang pambansang patrimonya. Malawakan ang pangangamkam ng lupa. Dinadambong nila ang likas na yaman ng bansa at winawasak ang kapaligiran. Nilalason nila ang tubig, mga pananim, pangisdaan, pastuhan at iba pang natural na pinagkakabuhayan. Isinasapanganib nila ang buhay ng tao. Labis ang pagsasa-

mantala nila sa mga manggagawa. Niyuyurakan nila ang kabuuang interes at kagalingan ng mamamayan.

Sa kalakhan ay mga pambansang minorya ang tinatamaan ng pinsalang ito dahil sila ang karaniwang nakatira at kadalasang nakarami sa mga lugar ng operasyon ng malalaking minahan. Walang pahintulot ng mamamayan at rebolusyonaryong kilusan ang pagpasok at operasyon ng malalaking minahan, at lumala-



**Mga tampok sa isyung ito...**

Dayuhang pagmimina, salot sa bayan PAHINA 3

"Pista" sa bayan ng San Agustin PAHINA 5

Lupa, hindi militarisasyon PAHINA 11

## Mga tuntunin sa paglilimbag

**1.** Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

**2.** Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

**3.** Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*